



*Jumat, 22 Januari 2021*

**Ogen: Jeremia 44:1-30**



**Ersada Arihna nimbak Tuhan**



Seh kal getemna pusuh Dibata ngenen lagu langkah bangsa Yahuda si erpekat radu ras mindo penampat ras ringan i negeri Mesir. Si enda ilakokenna perban biarna nandangi ancamen kerajaan Babil. La ibegina kai pe nina Tuhan arah nabi Jeremia. Teken ia ernalem nandangi negera Mesir asa man Dibata.

La kin ndia ingetna mbarenda Dibata me si pedarat ia i taneh perbudaken Mesir nari dengen maba bangsa ku Kanaan dengen ringan ije? Me taneh pemere Dibata nge ingan e? Tapi engkai maka genduari mulih ka atena ku Mesir? Lang pe kidekah enda kin pe enggo gara ukur Dibata ngenen bangsaNa sebab isembahna berhala-berhala kalak Kanan ras Mesir. Erdandanken sie maka la banci la seh me ukumen Dibata man bana. Ibuang me ia ku Babil kidekah pitu puluh tahun.

Perlu si eteh maka dosa si ilakoken bangsa Israel eme dosa si banci ka si lakoken alu model si berbeda ibas jamanta genduari enda. La megiken pedah Dibata banci terjadi arah kinilapatuhenta alu erbage bentuk paksa genduari enda. Umpamana, la siakap Dibata e si mehergana i bas geluhta. IA jadi pilih nomor sekian i bas geluhta. Ergan siakap duit asa Dibata, entah dahinta asa IA. Ergan siakap perbulangen entah anak-anakta asa Dibata. Ertina kai pe nina anakta la kita pang noganca. Jenari banci ka lit jabu ersada arih la ku gereja wari minggu e erkiteken gawah-gawah. Kerina enda bentuk uga kita nimbak Dibata i bas jamanta enda. Emaka adi erlarjar kita arah bangsa Israel maka la lit dosa si la iukum Dibata, emaka arusna kita kerina malang man Tuhan, la kita pang nimbak IA janah patuh dengen setia kita ngikutken kai si isuruhNa man banta. Kepatuhenta man Dibata eme sada biak si ngena ateNa.

➤ *Patuh dengen setia nandangi kai Pedah Dibata*

